



Broj: 07-08-04-39-3/23
Sarajevo, 24.07.2023. godine

SKUPŠTINA KANTONA SARAJEVO
Predsjedavajući Skupštine Kantona Sarajevo
- o v d j e -

PREDMET: Odgovor na zastupničko pitanje zastupnice Admele Hodžić

Zastupnica u Skupštini Kantona Sarajevo Admela Hodžić, na Osmoj radnoj sjednici Skupštine Kantona Sarajevo, postavila je **zastupničko pitanje** u okviru kojeg su sljedeća pitanja:

“Na osnovu čl. 106. i 213. Poslovnika Skupštine Kantona Sarajevo (“Službene novine Kantona Sarajevo”, broj 41/12 – Drugi novi prečišćeni tekst. 15/13, 47/13, 47/15, 48/16, 9/20, 14/29, 16/22 i 17/22-Ispravka) upućujem pitanje Ministarstvu privrede Kantona Sarajevo i Direkciji za turizam Kantona Sarajevo i tražim da mi se dostave odgovori u najkraćem mogućem roku na sljedeća pitanja:

1. Koji su poslovi koje je Direkcija za turizam Kantona Sarajevo vršila u posljednje 3 godine, a koji se odnose na poslove njihove nadležnosti kao što su stručni i s njima povezani upravni poslovi koji se odnose na razvoj turizma na području Kantona i razvoj turističkih potencijala od značaja za Kanton?

2. Koje mjere je Direkcija za turizam Kantona Sarajevo predložila za razvoj turizma i razvoj privatnog sektora u turizmu?

3. Koje turističke zone je formirala radi valorizacije nacionalnih parkova i zaštićenih zona sa turističkog aspekta i valorizacije njihovih ekonomskih prednosti?

4. Šta je učinjeno u smislu praćenja investicionih tokova i informisanja potencijalnih investitora za mogućnostima ulaganja u turizam na području Kantona?

5. Koje mjere je predložila za unapređenje i razvoj malog poduzetništva u turizmu?

6. Koje projekte je predložila i pratila iz oblasti turizma koji se finansiraju iz Budžeta Kantona, kao i turističkih destinacija na području Igman-Bjelašnica?

7. Koje projekte je realizirala po pitanju dodjele koncesija iz oblasti turizma?

8. Koliko je Direkcija za turizam Kantona Sarajevo izdala licenci putničkim agencijama-organizatorima putovanja.

9. Da li je izvršila bilo kakve analize iz svog domena rada i da dostavi sve analize koje je izradila po pitanju turističkih tokova na domaćem i unutrašnjem tržištu?

Direkcija treba da dostavi odgovore o rezultatima rada za gore navedena pitanja prema registrovanim radnim mjestima službenika Direkcije za posljednje 3 godine.

U Direkciji za turizam obavljaju se poslovi na sljedećim radnim mjestima: direktor Direkcije, stručni savjetnik za normativno - pravne poslove, stručni savjetnik za studijsko - analitičke poslove i stručni savjetnik za razvoj turizma.”

Odgovori na pitanja od 1. do 9. su sljedeći:

1. U članu 13. Zakona o ministarstvima i drugim organima uprave Kantona Sarajevo ("Službene novine Kantona Sarajevo", broj 40/22) propisan je djelokrug Ministarstva privrede Kantona Sarajevo i da su u sastavu Ministarstva privrede Uprava za šumarstvo i Direkcija za turizam. Direkcija za turizam je počela sa radom od 01.06.2022.godine kada je direktorica Direkcije za turizam, koju je imenovala Vlada Kantona Sarajevo, stupila na posao. U mjesecu decembru 2022. godine zaposlen je drugi zaposlenik pravne struke, tako Direkcija za turizam trenutno zapošljava 2 (dva) zaposlenika. Direkcija za turizam obavlja poslove u skladu sa Zakonom o turizmu i drugim zakonima i propisima relevantnim za ovu oblast. Ministarstvo privrede Kantona Sarajevo vrši, između ostalog, i upravni nadzor nad Turističkom zajednicom Kantona Sarajevo u skladu sa Zakonom o turizmu.

Direkcija za turizam uspostavlja temelje za rast i razvoj, a što će posebno doći do izražaja nakon izrade Strategije razvoja turizma Kantona Sarajevo, kao i ostalih planskih dokumenata, koji su neophodni i propisani Zakonom o turizmu ("Službene novine Kantona Sarajevo", broj: 19/16, 31/17, 34/17 - Ispravka i 13/21) - (u daljem tekstu: Zakon o turizmu).

Planiranje i razvoj turizma definisani su Zakonom o turizmu, ali da bi se planirao i razvijao turizam, neophodne su osnovne pretpostavke, a što je propisano u članu 4. Zakona o turizmu kao planska dokumenta. Naime, u skladu sa članom 4. Zakona o turizmu, planska dokumenta su:

- a) Strategija razvoja turizma Kantona Sarajevo,
- b) Marketing plan turizma Kantona Sarajevo,
- c) Plan promocije Kantona Sarajevo,
- d) Master – plan,
- e) Strategija razvoja turizma jedinice lokalne samouprave.


Temeljni dokumenat je Strategija razvoja turizma Kantona Sarajevo, kako bi se turizam u Kantonu Sarajevo razvijao planski i sistemski. Naprijed navedeni ostali planski dokumenti moraju biti usaglašeni sa Strategijom razvoja turizma Kantona Sarajevo. Naime, u skladu sa članom 5. Zakona o turizmu, Strategija razvoja turizma Kantona Sarajevo je sveobuhvatan dokument o srednjoročnom razvoju turističke privrede u skladu sa ukupnim ekonomskim, socijalnim, ekološkim i kulturno-historijskim razvojem Kantona, sa osnovnim ciljevima i vizijom razvoja turizma Kantona i služi kao polazna osnova za izradu ostalih planskih akata u turizmu.

Dodatno, Strategija razvoja turizma Kantona Sarajevo je dio strateškog planiranja turizma, usklađen sa prostornim planom Kantona Sarajevo za period 2003. - 2023., Strategijom razvoja Kantona Sarajevo 2021-2027. godine i temeljnim planskim i strategijskim dokumentima i politikama Federacije BiH, Bosne i Hercegovine i Evropske unije.

Strategija razvoja turizma Kantona Sarajevo se realizuje posredstvom Marketing plana Kantona Sarajevo, Plana promocije turizma Kantona Sarajevo, Master-plana, Strategije razvoja turizma jedinice lokalne samouprave, kao i posredstvom prostornih i urbanističkih planova u skladu sa zakonom koji reguliše oblast prostornog uređenja.

U vezi sa naprijed navedenim, uspostavljaju se temelji za unapređenje i konkretnije djelovanje Direkcije za turizam, u okviru Ministarstva privrede Kantona Sarajevo, kroz izradu i donošenje strateških dokumenata, prvo Strategije razvoja turizma Kantona Sarajevo, a zatim i ostalih planskih dokumenata, koji će omogućiti Direkciji za turizam implementaciju navedene strategije, kao i planiranje aktivnosti, projekata, programa, mjera, inicijativa i sl. za različite vrste turizma, a sve u skladu sa poslovima koji su propisani da se vrše u Direkciji za turizam u sastavu Ministarstva privrede Kantona Sarajevo. U toku procesa izrade Strategije razvoja turizma Kantona Sarajevo, očekujemo da će se redefinisati i uloga Direkcije za turizam.

Ministarstvo privrede Kantona Sarajevo je Odlukom Vlade Kantona Sarajevo broj: 02-04-49854-9/22 od 15.12.2022. godine, između ostalog, zaduženo za realizaciju aktivnosti izrade prve



Strategije razvoja turizma Kantona Sarajevo. Dana 05.07.2023. godine održan je prvi sastanak Fokus grupe za izradu Strategije razvoja turizma Kantona Sarajevo, čime je počeo rad na izradi prve Strategije razvoja turizma Kantona Sarajevo. Fokus grupa se sastoji od predstavnika iz javnog i privatnog sektora, kao i predstavnika nevladinog sektora.

Ministarstvo privrede Kantona Sarajevo, GIZ - njemačko društvo za međunarodnu saradnju i Sarajevska regionalna razvojna agencija SERDA d.o.o. Sarajevo, potpisali su Memorandum o razumijevanju, kojim je dogovoreno da Ministarstvo privrede Kantona Sarajevo, GIZ i SERDA d.o.o. Sarajevo osiguraju sve neophodne uvjete za implementaciju izrade Strategije razvoja turizma Kantona Sarajevo. Izrada strategije se finansira od strane Europske unije i Vlade Savezne Republike Njemačke, kroz projekat EU4Business Recovery, kojeg implementira GIZ - njemačko društvo za međunarodnu saradnju.

Ministarstvo privrede Kantona Sarajevo, u čijem sastavu je Direkciju za turizam, direktno je uključeno u realizaciju aktivnosti izrade Strategije razvoja turizma Kantona Sarajevo. Naime, direktorica Direkcije za turizam je jedan od dva člana Radne grupe za pripremu i izradu projektnog zadatka za izradu Prijedloga strategije, te nadzor i monitoring nad izradom Prijedloga strategije ispred Ministarstva privrede Kantona Sarajevo. Turizam je interdisciplinaran u svojoj suštini, izuzetno je svobuhvatan, trendovi se mijenjaju u globalnom svijetu u kojem živimo te je širok dijapazon znanja potreban, a što je, između ostalog potrebno, i za nadzor i monitoring nad izradom Strategije razvoja turizma Kantona Sarajevo, implementaciju navedene strategije i buduću izradu ostalih propisanih planskih dokumenata.

Neke od aktivnosti Direkcije za turizam u sastavu Ministarstva privrede, a odnose sa na upravni nadzor nad radom Turističke zajednice Kantona Sarajevo, su sljedeće:

- u skladu sa članom 84. stav (3) Zakona o turizmu, Ministarstvo privrede Kantona Sarajevo daje saglasnost na godišnji finansijski plan Turističke zajednice Kantona Sarajevo i godišnji program rada Turističke zajednice Kantona Sarajevo, kao i njihove izmjene i dopune;
- u skladu sa članom 87. Zakona o turizmu izvršen je nadzor nad postupanjem organa Turističke zajednice Kantona Sarajevo prilikom donošenja odluka u vezi sa izmjenama i dopunama Finansijskog plana Turističke zajednice Kantona Sarajevo za 2022. godinu, kao i izmjenama i dopunama Programa rada Turističke zajednice Kantona Sarajevo za 2022. godinu;
- u skladu sa članom 85. Zakona o turizmu, Direkcija za turizam u sastavu Ministarstva privrede, inicirala je sveobuhvatno prikupljanje izvještaja o radu i finansijskih izvještaja sa pratećom dokumentacijom Turističke zajednice Kantona Sarajevo za prethodne godine, odnosno od 2016. godine, kada je osnovana Turistička zajednica Kantona Sarajevo, pa sve do 2022. godine kako bi se svi izvještaji sa pratećom dokumentacijom pregledali, pripremili i dostavili na razmatranje Vladi Kantona Sarajevo i Skupštini Kantona Sarajevo, jer isti nisu razmatrani;
- pregledani su svi godišnji izvještaji sa pratećom dokumentacijom za naprijed navedeni period, a trenutno je u toku pregled Izvještaja Turističke zajednice Kantona Sarajevo za 2023. godinu, koji se radi paralelno sa ostalim brojnim aktivnostima Direkcije za turizam, kako bi se uskoro dostavio na razmatranje Vladi Kantona Sarajevo i Skupštini Kantona Sarajevo;
- u skladu sa Zaključkom Vlade Kantona Sarajevo broj: 02-04-51323-71/22 od 29.12.2022. godine o moratoriju na upošljavanje, Direkcija za turizam u Ministarstvu privrede Kantona Sarajevo obavlja i poslove koji se odnose na pripremu saglasnosti koje daje resornog ministra za ugovor o djelu ili ugovor o privremenim i povremenim poslovima, tako da se i kroz ove aktivnosti vrši nadzor nad aktivnostima Turističke zajednice Kantona Sarajevo;
- na osnovu određenih zahtjeva Turističke zajednice Kantona Sarajevo, Direkcija za turizam priprema i materijale za Vladu Kantona Sarajevo i Skupštinu Kantona Sarajevo, sa prijedlozima zaključaka i odluka vezanim za predmetne zahtjeve.



2. Direkcija za turizam je pripremila nacrt Programa Subvencioniranja avio-linija, koji je usvojila Vlada Kantona Sarajevo i rezultat je zajedničkog rada Turističke zajednice Kantona Sarajevo, Ministarstva privrede Kantona Sarajevo i Međunarodnog aerodroma Sarajevo.

Kroz aktivnosti Ministarstva privrede Kantona Sarajevo, u skladu sa Zakonom o poticaju razvoja male privrede ("Službene novine Kantona Sarajevo" broj 29/15), biznisi iz privatnog sektora u turizmu mogu aplicirati na javne pozive ovog Ministarstva.

Turistička zajednica Kantona Sarajevo, također, sa svojim aktivnostima i projektima ima značajan uticaj na razvoj turizma u Kantonu Sarajevo. U skladu sa članom 60. Zakona o turizmu (Ciljevi osnivanja i osnivanje Turističke zajednice Kantona Sarajevo), Turistička zajednica Kantona Sarajevo se osniva radi razvoja turizma, unapređenja turizma i promocije turizma na području Kantona u cjelini i privrednih interesa pravnih i fizičkih lica koja pružaju ugostiteljske i druge turističke usluge ili obavljaju drugu djelatnost neposredno povezanu sa turizmom.

Članom 61. Zakona o turizmu detaljno su navedene djelatnost i zadaci Turističke zajednice Kantona Sarajevo. U skladu sa članom 82., stav (2) Zakona o turizmu Turistička zajednica dužna je najmanje 70% ostvarenih sredstava od boravišne takse utrošiti za razvoj i unapređenje turističke ponude Kantona Sarajevo.

3. Direkcija za turizam provodi određene aktivnosti i istraživanje, u vezi određivanja turističkih zona koje je potrebno definisati radi unapređenja razvoja turizma, a počele su i konsultacije sa stručnjacima. Istovremeno, sama Strategija razvoja turizma Kantona Sarajevo, u suštini će odgovoriti na određene bitne segmente razvoja turizma i turističke privrede Kantona Sarajevo. Ovaj proces će teći paralelno sa procesom izrade Strategije razvoja turizma Kantona Sarajevo. Direkcija za turizam smatra da će biti potreban multidiscipliniran tim sastavljen od stručnjaka iz različitih oblasti, kako bi se odredile turističke zone u Kantonu Sarajevo, stručna studija i sl., a nakon toga prijedloge unijeti u zakonske i podzakonske dokumente. Direkcija za turizam u sastavu Ministarstva privrede Kantona Sarajevo će voditi i koordinirati ovaj proces.

Prije proglašenja nekog područja zaštićenim u skladu sa odredbama Zakona o zaštiti prirode ("Službene novine Federacije BiH", broj 66/13) vrši se valorizacija tog područja i to u granicama koje su definisane važećom prostorno-planskom dokumentacijom, konkretno Prostornim planom Kantona Sarajevo. Valorizaciju prirodnih i drugih vrijednosti nekog područja provodi stručna institucija, a u okviru valorizacije se sagledava i segment turizma, koji nije primarna djelatnost i svrha zaštite, već je to održivo korištenje, zaštita i promocija identifikovanih vrijednosti tog područja. Nacionalni parkovi i njihovo proglašenje nije u nadležnosti Kantona Sarajevo, nego u nadležnosti Federacije BiH. Kanton je nadležan za proglašenje spomenika prirode, parkova prirode, zaštićenih pejzaža i dr.

4. Vezano za aktivnost praćenja investicionih tokova i informisanja potencijalnih investitora za mogućnostima ulaganja u turizam na području Kantona, ova aktivnost će biti implementirana nakon izrade Strategije razvoja turizma u Kantonu Sarajevo. Jedan od očekivanih rezultata ove strategije je i detaljno razrađen akcioni plan sa vremenskom dinamikom aktivnosti (po fazama) i neophodnim resursima za realizaciju strategije razvoja turizma u Kantonu Sarajevo, a također očekujemo saradnju javnog i privatnog sektora.

5. Vezano za unapređenje i razvoj malog poduzetništva u turizmu odgovor je sadržan u odgovoru na 2. pitanje. Dodatno, većina mjere poduzetih od strane Turističke zajednice Kantona Sarajevo i Ministarstva privrede Kantona Sarajevo na osnaživanju turizma i pomoći pri oporavku ovog sektora od posljedica pandemije COVID-a su poduzete u 2020. i 2021. godini. Turistička zajednica Kantona Sarajevo, u cilju osnaživanja turističkog sektora i bržeg oporavka od posljedica pandemije korona virusa COVID-19, provela je sljedeće aktivnosti:



- Istraživanje "Uticaj pandemije korona virusa na industriju turizma u Kantonu Sarajevo" koje su proveli Turistička zajednica Kantona Sarajevo i prof. dr Almir Peštek sa Ekonomskog fakulteta u Sarajevu (april 2020).

- Javni poziv za dodjelu sredstava Turističke zajednice Kantona Sarajevo za sufinansiranje hotelijera/smještajnih objekata, incoming putničkih agencija i turističkih vodiča, čije je poslovanje onemogućeno usljed posljedica prouzrokovanih pandemijom korona virusa COVID-19 (maj 2020). Ukupan iznos dodijeljenih sredstava je 1.000.000.00 KM.

- Program subvencioniranja turističko-ugostiteljskih usluga smještaja putem e-koda "Odmori u Sarajevu", namijenjen subvencioniranju turističko-hotelskog smještaja, u saradnji sa Vladom Kantona Sarajevo (2021/2022). Ukupan iznos 410.000.00 KM.

- Javni pozivi Turističke zajednice Kantona Sarajevo za dodjelu bespovratnih sredstava koji imaju za cilj ubrzanje oporavka turističkog sektora kroz obogaćivanje turističke ponude i smanjenje sezonalnosti turističkih posjeta, kroz kreiranje kvalitetnih sadržaja i bogatih programa tokom cijele godine.

Kao posebnu mjeru pomoći turističkom sektoru u procesu oporavka od posljedica pandemije korona virusa COVID-19, Skupština Kantona Sarajevo donijela je Zakon o dopuni Zakona o turizmu ("Službene novine Kantona Sarajevo", broj 13/21) kojim je iznos članarine, koju su pravna lica u obavezi plaćati Turističkoj zajednici Kantona Sarajevo, umanjen za 50 % u kalendarskoj 2021. godini.

6. Direkcija za turizam prati projekte i aktivnosti koji se implementiraju na području Bjelašnica -Igman kroz međusektorsku saradnju u okviru Ministarstva privrede Kantona Sarajevo. Projekti na Bjelašnici su projekti KJP "ZOI'84" d.o.o. Sarajevo.

7. Vezano za pitanje koje se odnosi na koncesije u oblasti turizma, napominjemo da do sada nije bilo zahtjeva za dodjelu koncesija u oblasti turizma.

8. Prema Registru izdatih licenci, Direkcija za turizam Kantona Sarajevo izdala je 44 (četrdeset i četiri) licence organizatorima turističkog putovanja.

9. Direkcija za turizam u sastavu Ministarstva privrede Kantona Sarajevo je izvršila analizu o nedostatku Strategije razvoja turizma i ostalih strateških dokumenata, koja je prethodila svim aktivnostima prije početka samog procesa izrade strategije, a što je detaljno objašnjeno u odgovoru broj 1.

S poštovanjem



Dostaviti:

1. Naslovu.
2. Vladi Kantona Sarajevo - na znanje.
3. Evidenciji.
4. a/a.

